

Kalaallit Nunaanni eqqartuussisarnermik inatsisip allannguutaa pillugu (Pinerluttulerinermi suliani nassuiaatinik atuineq, timikkut misissuinnermut malittarisassanik allannguneq, Kalaallit Nunaanni Eqqartuussivimmi sulisunik aalajangersaaneq il.il.) Inatsisissatut siunnersuummut missingiut

(Peqqissutsimut, Isumaginninnermut Inatsisinillu atuutsitsinnermut Naalakkersuisoq)

Saqqummiussissut

(Peqqissutsimut, Isumaginninnermut Inatsisinillu atuutsitsinnermut Naalakkersuisoq)

Siullermeerinnineq

Naalakkersuisuusimasut *Inatsisinik atuutsitsinnermut suliassaqarfimmi periusissatut suliniutissanullu pilersaarut* 2017-imi saqqummiuppaat. Inatsisinik atuutsitsinnermut suliassaqarfimmi pitsaassutsip qaffatsinneqarnissaa, taamaalilluni danskit qaffasissusaannut assigiissinneqarnissaa periussatut pilersaarutip siunertaraa. Periusissami suliniutit Naalakkersuisut suli ingerlateqqinniirpaat matumuunalu Inatsisinik atuutsitsinnermut suliassaqarfup pitsaanerulernissaa suliniuteqarfigalugu.

Tamanna tunuliaqutaralugu Naalakkersuisut aalajangiiffigisassatut siunnersuut eqqartuussisarnermut inatsisimmi allannguutini imalik saqqummiuppaat. Inatsisissatut siunnersuummi immikkoortut pingaernerit sisamaapput.

Eqqartuussivimmi nipinik immiussisinaanerup periarfissaanissaa inatsisissatut siunnersuummi siullertut siunertaavoq. Taamaaliornikkut eqqartuussinermi aqutsinnermut eqqartuussinerullu ingerlanerintut pisinnaasanik pitsaanerusunik pilersitsisoqassaaq aammalu pinerluttulerinermi suliani, aqqissuussineq malillugu eqqartuussissuummi nassuiaanernik issuaaffiusariaqanngitsuni eqqartuussissutiniq suliareqqiinermi periuseq sulinerlu ajornannginnerulissalluni. Aammattaaq aqqissuussinikkut nassuiaatinik nalunaarsueriaatsip piviusuunera, paatsuugassaanginnera isumannaatsuuneralu qulakkeerneqassapput.

Politiit pinerluttoqarsimaneranik paasiniaasarnerannut tunngatillugu periarfissaannik pitsanngorsaanissaaq anguniarlugu kingusinnerusukkut kinaassusersiiniarluni pasisaniit dnamik tiguisarnermut tunngatillugu ullutsinnut naapertuunnerusunik malittarisassaqaqalernissaat inatsisissatut siunnersuummi aappaattut siunertarineqarpoq, taamaattumik tamatuma ilaatigut Naalakkersuisut kinguaassiutitigut atornerluineq akiorniarlugu periusissiaannut (2018-2022), Killiliisamik taaguuteqartumut atatillugu isigineqassaaq.

Kalaallit Nunaanni Eqqartuussivinni eqqartuussisumik allamik eqqartuussisunngortitsisoqarsinnaanissaata qulakkeerneqarnissaa inatsisissatut siunnersuummi pingajuattut siunertarineqarpoq, taamaalilluni sullissinerit sivikinnerulernissaasa anguniarnissaat periarfissaanerulissalluni, taamatuttaarlu Kalaallit Nunaanni Eqqartuussivinni eqqartuussisoqarfinni eqqartuussisunik atorfinnullu qinnuteqartunik piginnaanngorsaanissamut suliniutit annertusarneqarsinnaassallutik. Taakkua saniatigut Nunatta Eqqartuussisuuneqarfiani aamma Kalaallit Nunaanni Eqqartuussivinni eqqartuussisunik utaqqiisaasumik toqqaanissamut periarfissat pitsanngorsarneqassapput.

Suliassanik isumaginninnerup tamarmiusup pitsanngorsarnissaa anguniarlugu aammalu KANUKOKA-p (Kalaallit Nunaanni Kommunit Kattuffiat) 31. juli 2018-imi

atorunnaarsinneqarnerata kingunerisaanik siunnersuisoqatigiit aalajangiisartullu arlallit, matumani Kalaallit Nunaanni eqqartuussiveqarneq pillugu Siunnersuisoqatigiit katitigaanerisa iluarsaannissaat inatsisissatut siunnersuummi kingullertut siunertarineqarpoq.

Inatsisissatut siunnersuutip matuma Inatsisartuni Folketingimilu ataatsikkut suliarineqarnissaa Justitsministeeriaqarfiup qaqutigootumik inassutigisimavaa. Tassa imaappoq inatsisissatut siunnersuut Inatsisartuni Folketingimilu ataatsikkut suliarineqassasoq, taamaakkaluartoq Inatsisartut inaarutaasumik oqaaseqaataat inatsisissatut siunnersuutip pingajussaarneerineqarnissaa sioqqullugu naammassineqareersimassalluni.

Taamatut ingerlatseriaaseqarnermi Kalaallit Nunaanni Eqqartuussivinni saniatigut allamik eqqartuussisumik ukioq manna toqqaasoqarsinnaanera siunertarineqarpoq. Inatsisunik atuutsitsinermut suliasaqarfimmut aningaasaliissutinit matumunnga aningaasanik immikkoortitsisoqarsimavoq, pingaaruteqarluinnarporlu taakku tuaviernerpaamik atorineqarnissaat, taamaalilluni Kalaallit Nunaanni eqqartuussiviit piffissap ilaani eqqartuussisunik amigaateqassanngimmata. Tamanna suliarpassuit massakkut tigummineqartut ikilisarnissaannut pingaartorujussuuvoq, aammalu suliat sionatigutut qaleriiaaginnalinnginnissaannut pingaaruteqartussaalluni.

Taamaattumik siunnersuut Inatsisartuni Folketingimilu piaarnerpaamik akuerineqarnissaa pingaaruteqarluinnarpoq, taamaaliortoqarsinnaavorlu ataatsikkut suliarinninnikkut.

Naalakkersuisut taamatut oqaaseqarlutik immikkoortoq Inatsisartunut oqaluuserisassanngortippaat.